

AAQQIISUTIT

Siunnersuut 19. august 2021-meersoq taarserpaa

(Oqaasertai aaqqinneqarput uani § 7, imm. 2, aammattaaq § 21, imm. 2. Nammineq akiliutip annertussusiata allanngortinneqarnera uani § 15, imm. 2. Allannngortinneqarpoq una § 22, imm. 5, taarsiinissamut suliani sulianik ingerlatseriaatsimut periarfissat.

Ilanngunneqarpoq § 22, imm. 6 maalaarutip ingerlateqqinneqarnissaanut periarfissamut killiussaq pillugu. Ilanngunneqarpoq una § 22, imm. 7 allamik pisoqarsinnaanera § 22, imm. 6 maalaarutip ingerlateqqinneqarnissaanut periarfissamut killiussamut tunngatillugu.

Ilanngunneqarpoq immikkoortumut qulequtaq §§ 23-p aamma 24-p akornanni, pineqaatissoqarsinnaaneranut aalajangersakkat pillugit. Atuutilersitsinissamut aalajangersakkat § 25-mi allanngortinneqarnerat. Allannngortitsinerup kingunerisaanik §§ 24-25 allannngortinneqarput)

Uunga siunnersuut:

**Peqqinnissaqarfiup iluani napparsimasut maalaaruteqarsinnaanerat
taarsiiffigineqarsinnaanerallu pillugit Inatsisartut Inatsisaat**

Kapitali 1

Nalinginnaasumik aalajangersakkat

Atuuffia

§ 1. Inatsisartut Inatsisaat peqqinnissaqarfimmi peqqissaanermik suliaqarneq pillugu maalaaruteqarnermut, peqqinnissaqarfimmi peqqinnissamut tunngasutigut sulineq, suliarinninnivik pillugu maalaaruteqarnermut (sullinneqarnermut maalaarutit) kiisalu napparsimasut ajoqusernerinut taarsiinissaq pillugit sulianut atorneqarpoq.

Imm. 2. Pinneraallutik passussisartut kakiuisartullu Inatsisartut inatsisaannut matumunnga ilaanngillat, taamaattorli naggatit 2-at aamma 3-at takukkit. Kakiuisartut, nakorsaanikkut kakiuisut Inatsisartut inatsisaannut ilaapput. Nakorsaasersuinissaq siunertaralugu peqqissaasutut akuerisamit pinneraalluni katsorsaanerit Inatsisartut inatsisaannut ilaapput.

Imm. 3. Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuuseqartarneq pillugit Inatsisartut Inatsisaat malillugu maalaarutit Inatsisartut inatsisaannut matumunga ilaanngillat.

Imm. 4. Nakorsaatinut ajoquserneqarnermut taarsiinissaq pillugu suliat Inatsisartut inatsisaannut matumunga ilaanngillat.

Imm. 5. Peqqinnissamut suliaqarsinnaasutut akuersissummik pigisaqartut saniatigut peqqinnissamut katsorsaasartut suliaqartartut allat pillugit Naalakkersuisut maleruaqqusanik aalajangersaasinnaapput, taakkua Inatsisartut inatsisaannut matumunnga ilaatinneqarsinnaanerat pillugu.

Nassuiaatit

§ 2. Inatsisartut inatsisaanni matumani makku imatut paasineqassapput:

- 1) Peqqinnissaqarfik: peqqinnissaqarfik tamakkerlugu, taakkununga ilanngullugit napparsimmaviit, peqqissaaviit, nunaqarfinni napparsimmaveeqqat, nunaqarfinni nakorsiartarfiit il.il.
- 2) Peqqissaanermik suliaqartut: katsorsaaneq napparsimasut inatsisitigut inissisimanerat pillugu Inatsisartut peqqussutaani nassuiarneqartutut isumaqarpoq.
- 3) Peqqinnissamut tunngasuni atorfilik: peqqinnissamut tunngasuni atorfillit qallunaat nunaanni akuersissummik pigisaqarneq tunngavigalugu peqqinnissamut tunngasunik sullissisut, taakkununga ilanngullugit nakorsat, kigutit nakorsaat, kiropaktorit, pillorissaasut, timimik sungiusaasut, aaviisartut il.il. aamma peqqinnissamut tunngasuni atorfillit Kalaallit Nunaanni ilinniagaqarsimaneq imaluunniit akuersissummik pigisaqarneq tunngavigalugu peqqinnissamut tunngasunik sullissisut, taakkununga ilaapput peqqissaasutut ilinniarsimasut, kigutigissaasut, peqqinnissamut ikiortit il.il.

Kapitali 2*Maalaaruteqarnissamut periarfissat**Peqqissaanermik suliaqarnermi ingerlatsineq pillugu maalaaruteqarsinnaaneq*

§ 3. Peqqinnissaqarfiup peqqissaanermik suliaqarluni ingerlatsinera pillugu napparsimasut maalaarutaat kiisalu napparsimasut inatsisitigut inissisimanerat pillugu Inatsisartut peqqussutaanni kapitali 2-5-imi allassimasut pissutsit pillugit maalaarutit Danmarkimi Napparsimasut maalaarutaannut Aqutsisoqarfiup (Styrelsen for Patientklager i Danmark) isumagisarai. Napparsimasut maalaarutaannut Aqutsisoqarfiup naggatip 1-ip kingornatigut maalaarut isumagisinnaanngilaa, imaappat peqqissaanermik suliaqarluni ingerlatsinermut maalaarummi pineqartoq tamakkerluni imaluunniit ilaannakortumik § 4-mut ilaatinneqarluni.

Imm. 2. Napparsimasut maalaarutaannut Aqutsisoqarfik peqqissaanermik suliaqarluni ingerlatsineq peqqissaanermik suliaqarnermi nalinginnaasutut isigineqartunit appasinnerunersoq imaluunniit katsorsaavik napparsimasup inatsisitigut pisinnaatitaaffii pillugit malittarisassanut akerliusumik iliuuseqarsimansoq pillugu aalajangiissaaq.

Imm. 3. Imm. 2 naapertorlugu aalajangiinerit allaffissornikkut oqartussanut allanut ingerlateqqinneqarsinnaanngillat.

§ 4. Peqqinnissaqarfiup peqqissaanermik suliaqarluni ingerlatsinera pillugu napparsimasut maalaarutaat kiisalu Napparsimasut inatsisitigut inissisimanerat pillugu Inatsisartut peqqussutaanni kapitali 2-5-imi allassimasut pissutsit pillugit maalaarutit Danmarkimi Napparsimasut maalaarutaannut Aalajangiisartut (Sundhedsvæsenets Disciplinærnev) isumagisarai. Maalaarut § 3 naapertorlugu peqqinnissaqarfiup peqqissaanermik suliaqarluni ingerlatsineranik maalaarummut ilaappat, taava Aalajangiisartut maalaarut suliarisinnaanngilaat.

Imm. 2. Peqqissaanermik suliaqarluni ingerlatsineq peqqissaanermik suliaqarnermi nalinginnaasutut isigineqartunit appasinnerunersoq imaluunniit katsorsaavik napparsimasup inatsisitigut pisinnaatitaaffii pillugit malittarisassanut akerliusumik iliuseqarsimanersoq pillugit Napparsimasut maalaarutaannut Aalajangiisartut aalajangiisassaaq.

Imm. 3. Imm. 2 naapertorlugu aalajangiinerit allaffissornikkut oqartussanut allanut ingerlateqqinneqarsinnaanngillat.

§ 5. Peqqinnissaqarfiup peqqissaanermik suliaqarluni ingerlatsinera pillugu maalaarutit kiisalu napparsimasut inatsisitigut inissisimanerat pillugu Inatsisartut peqqussutaanni kapitali 2-5-imi allassimasut pissutsit pillugit maalaarutit Nunatsinni Nakorsaaneqarfimmut tunniunneqassapput.

Peqqinnissamat tunngasunik sulineq pillugu maalaarutininik suliarinninneq

§ 6. Nunatsinni Nakorsaaneqarfik § 5 naapertorlugu maalaarummik tigusaqaruni, Inatsisartut Inatsisaat manna naapertorlugu maalaarut suliarineqarsinnaanersoq Nunatsinni Nakorsaaneqarfiup nalilissavaa.

Imm. 2. Nunatsinni Nakorsaaneqarfik katsorsaavimmit maalaarutigineqartumit imaluunniit peqqissaanermi suliaqartumit maalaarutigineqartumit journalini allattukkanik aamma oqaaseqaammik pissarsiniassaaq, aamma suliap aalajangersimasup naliliiffigineranut pingaaruteqartutut isigineqarsinnaasunik Kalaallit Nunaanni pissutsinik atukkanillu allaaserinnittumik suliamik saqqummiussissaaq. Suliamik saqqummiussineq atugassallu Napparsimasut maalaarutaannut Aqutsisoqarfimmut nassiunneqassapput aamma maalaarummik aqutsisoqarfiup suliarinninneranut tunngavissatut ilaatinneqassallutik.

Imm. 3. Nunatsinni Nakorsaaneqarfik suliap piareersarneranut atatillugu pisoqalisoorsimaneq pillugu aalajangiisinnaavoq. Pisoqalisoortoqarsimasinnaaneranik apeqqut pillugu aalajangiinermik maalaaruteqartoqarpat, suliaq Napparsimasut maalaarutaannut Aqutsisoqarfimmut suliaassanngorlugu nassiunneqassaaq, § 3 takuuk.

Imm. 4. Maalaarut erseqqissumik tunngavissaqanngippat taamaasillunilu Inatsisartut inatsisaannut ilaatinneqarnani, taava Nunatsinni Nakorsaaneqarfiup maalaarutip suliarinissaa itigartitsissutigisinnaavaa. Itigartitsinermik aalajangiineq maalaarutigineqarpat taava suliaq Napparsimasut maalaarutaannut Aqutsisoqarfimmut suliaassanngorlugu nassiunneqassaaq, § 3 takuuk.

Imm. 5. Nunatsinni Nakorsaaneqarfiup danskisuumut kalaallisuumullu nutserinissaq qulakkiissavaa.

§ 7. Nunatsinni Nakorsaaneqarfik piffissaliussap qaangiutinnginnerani maalaarummik tigusaqaruni, § 5 naapertorlugu, taava Nunatsinni Nakorsaaneqarfiup napparsimasoq katsorsaaviusumik oqaloqateqarnissaanik neqeroorfigissavaa. Napparsimasoq neqeroorummut akuersippat maalaarut katsorsaavimmut nassiunneqassaaq, taannalu napparsimasumut attaveqarluni maalaarummillu katsorsaaviup tigusaqarnerminit kingusinnerpaamik sapaatit akunneri sisamat qaangiutsinnagit oqaloqatigiinnissaq neqeroorutigissavaa.

Imm. 2. Oqaloqatigiinnerup kingorna napparsimasup maalaarutimi taamaatinnessaa kissaatiginnippagu napparsimasup akuerisinneratigut, tamanna pillugu katsorsaavik Nunatsinni Nakorsaaneqarfimmut nalunaaruteqassaaq, tamatumalu kingorna maalaarut naammassineqartutut isigineqassalluni. Oqaloqatigiinnerup kingornatigut napparsimasup maalaarutimi suliarineqarnissaa kissaatigippagu suliame paasissutissat attuumassuteqartut tamaasa suliap ingerlatinneqarnissaanut atugassanngorlugit katsorsaaviup Nunatsinni Nakorsaaneqarfimmut nassiutissavai.

Pisoqalisoorneq pillugu aalajangersakkat

§ 8. Maalaarut § 5 naapertorlugu pisimasup maalaarutiginiakkap ilisimalerneranit imaluunniit ilisimalersimasariaqalerfianit ukiut marluk qaangiutsinnagit Nunatsinni Nakorsaaneqarfimmut tunniunneqassaaq.

Imm. 2. Taamaakkaluortoq § 5 naapertorlugu maalaarutaasoq, maalaaruteqarsinnaanermut pissutaasut pisimanerata ulluata kingornatigut kingusinnerpaamik ukiut tallimat qaangiutsinnagit tunniunneqassapput.

Imm. 3. Maalaaruteqarnissamut killissarititat imm. 1-imi aamma 2-mi taaneqartunut immikkut akuersissuteqartoqarsinnaanngilaq.

Suliarinninnivik pillugu maalaarut (sullinneqarnermut maalaarutit)

§ 9. Sullissineq pillugu maalaarutit Nunatsinni Nakorsaaneqarfimmut tunniunneqassapput.

Imm. 2. Maalaarut Nunatsinni Nakorsaaneqarfiup peqqinnissaqarfimmi qullersaasutut aqutsisunut maalaarummik suliarinnittussamut ingerlateqqissavaa.

Imm. 3. Maalaarutip tiguneqarneraniit qaammatit pingasut qaangiutsinnagit maalaarut suliarineqassaaq.

Kapitali 3

Napparsimasut taarsiifigineqarnissaanik suliap

Napparsimasut ajoqusernerinut taarsiineq

§ 10. Kapitalimi matumani malittarisassat malillugit napparsimasunut imaluunniit napparsimasunut qimagaasunut Kalaallit Nunaanni misissortinnernut, suliaritinninnermut assigisaannilluunniit peqqinnissaqarfimmi sulisumit imaluunniit peqqinnissaqarfimmi sulisunit allanit, pisortat oqartussaaffiini allanit imaluunniit namminersortunit suliarineqartunut atatillugu ajoqusernertut taarsiissuteqartoqassaaq.

Imm. 2. Napparsimasunut sanilliunneqarput napparsimasup nappaataata suussusersineranut imaluunniit katsorsarneqarneranut atasumik ilaanngitsuni peqqinnissakkut ilisimatusarnermi misileraanermi peqataasut. Aamma taamaapput timip pisataanik tunisisut, timip ipiutaasartaannik atortunillu uumassuseqartunit tigusiffiusut.

Imm. 3. Kapitali manna aamma napparsimasunut Kalaallit Nunaata avataani napparsimmavinni, klinikkini il.il. akeqanngitsumik katsorsarneqartunut imaluunniit katsorsartinnermut tapiiffigineqartunut, katsorsaaviumi inatsisit malillugit taarsiisoqarnissaanut periarfissaqanngitsunut atuuppoq.

Imm. 4. Suliassaqarfiit sorliit aalajangersakkami ilaanerat pillugit malittarisassanik erseqqinnerusunik Naalakkersuisut aalajangersaasinnaapput.

Ajoqusernerit taarsiivigineqarsinnaasut

§ 11. Taarsiisoqassaaq uku arlaannit ajoqusertoqarsimanera ilimanavippat imatullu pisimappat:

1) Suliassaqarfimmi pineqartumi immikkut ilisimasalik misilittagaqartoq Kalaallit Nunaanni allatigut pissutsini atugaasuni misissuinermi, katsorsaanermi assigisaaniluunniit allatut iliuseqarsimasinnaagaluartoq naatsorsuutigineqarsinnaappat, taamaalilluni ajoquserneq pinngitsoortinneqarsinnaasimagaluarluaeluni.

2) Ajoquserneq misissuinermi, katsorsaanermi assigisaaniluunniit taakkunungaluunniit atatillugu atorineqartuni teknikikkut atortuni, sakkuni atortuniluunniit allani kukkunermik imaluunniit ajutoornermik pissuteqarpat.

3) Kingornatigut naliliineq aallaavigalugu katsorsaanermut tekniki imaluunniit katsorsaanermi periuseq alla katsorsaavigineqartumi pigineqartoq atorlugu ajoquserneq pinngitsoortinneqarsinnaasimagaluarpat, tamanna nakorsatut isiginninneq aallaavigalugu napparsimasup nappaataanik katsorsaanermut atorlugu assinganik sunniuteqarsinnaasimalluni.

4) Misissuinerup malitsigisaanik, tassunga ilanngullugu nappaammik suussusiniarluni pilattaaneq, imaluunniit katsorsaanermi napparsimasup naammaginartumik naammagiinnarsinnaasaanit annertunerusumik aseruttoornikkut allatigulluunniit nappaatip nassataatigut ajoquserneqarsimappat. Tassani ilaatigut ajoqusernerup ilungersunartuunera, ilaatigut napparsimasup nappaataa allatigullu peqqinnikkut qanoq ittuunera kiisalu ajoqusernerup qaqutigoortuunera taassumalu ajoqusiisinnaaneranut periarfissat eqqarsaatigineqassapput.

§ 12. Napparsimasup nappaataata eqqortumik suussuserneqannginnerata malitsigisaanik ajoqusernermi § 11, nr. 1-imi aamma 2-mi pisut taaneqartut taamaallaat taarsiiviginninnissamut tunngaviusinnaapput.

Imm. 2. Ajutoornermi, § 11 nr. 2-mut ilaanngitsuni taamaallaat taarsiisoqassaaq ajoqusertoq katsorsaavimmi katsorsarneqarpat il.il. ajutoornerlu taassuma iluani pisimappat pisuni taamaattuni katsorsaavik nalinginnaasumik taarsiinissamut inatsisini malittarisassat malillugit tamatumunnga taarsiisussatut akisussaasuusutut isigineqartariaqarluni.

§ 13. § 10, imm. 2-mi ilaasunut inunnut misileraaffigineqartunut timillu pisataanik tunisisunut misileraaneq imaluunniit timip ipiutaasartaanik il.il. tigusineq pissutigalugu

ajouserternut sunulluunniit taarsiisoqassaaq, ajoqusernerup allamik peqquteqarnera ilimanavinnigippat.

§ 14. Peqqinnissamut tunngasuni atorfilik kinaluunniit sulinermini kapitali manna malillugu taarsiiffigitinneqarsinnaasutut naatsorsuutigisariaqartunik ajoqusernernerup ilisimasaqalersoq tamanna pillugu ajoquserneqartumut ilisimatitsisussaataavoq kiisalu pisariaqartitsineq malillugu Nunatsinni Nakorsaaneqarfimmut nalunaarutiginninnissamik ikiuuttussaataalluni.

Imm. 2. Paasissutissiinissamut pisussaaffik pillugu malittarisassanik erseqqinnerusunik Naalakkersuisut aalajangersaasinnaapput.

Taarsiinissamik annertussusilineq il.il.

§ 15. Taarsiineq ajunngitsorsiassallu taarsiinissamut akisussaaneq pillugu inatsimmi malittarisassat malillugit aalajangersarneqassapput.

Imm. 2. Taarsiiffigitinneq aamma ajunngitsorsiassat imm. 1 naapertorlugu tunniunneqassapput nammineq akiliutit 7.971 kr.-nit taarsiissutinit imaluunniit ajunngitsorsiassap annertussusiannit ilanngaatigereerlugit.

Imm. 3 Imm. 2 naapertorlugu nammineq akiliutit pillugit malittarisassat aalajangersarneqartut § 10, imm. 2-mi ajoqusernernerup ilaasunut atuutinneqassanngillat.

Imm. 4. Alla sinnerlugu akilersimasanut piunnaasaqaatit matussutissaannut taarsiisoqassanngilaq, taamaattoq § 18 takuuk.

Imm. 5. Imm. 2-mi aki ukiumoortumik iluarsineqartarpoq, Procenti aaqqiissutissaq aamma maannakkorpiaq aningaasarsiat pillugit Inatsisartut Inatsisaat takuuk.

Imm. 6. Naalakkersuisut maleruaqqusanik aalajangersaasinnaapput makku pillugit, tassa sulinermi aningaasarsianut annaasanut taarsiissuteqarneq aamma anniarnermut taartisinissamut tunngatillugu, imaappat ajoqusernerup kingunerisaanik sulisinnaajunnaartoqarsimappat imaluunniit napparsimasoqarpat piffissami aalajangersakkamik sivisussuseqartumi, taanna annerpaamik qaammatinik pingasunik sivisussuseqarsinnaavoq.

§ 16. Napparsimasumut imaluunniit taassuma qimataanut taarsiissutissaq appartinneqarsinnaavoq imaluunniit pissutsit naapertorlugit atorunnaarsinneqarsinnaavoq, imaappat napparsimasoq piaaraluneerluni imaluunniit mianersuaalliorujussuarluni ajoqusernermut pisooqataasimappat.

§ 17. Kapitalimi matumani malittarisassat naapertorlugit napparsimasoq taassumaluunniit qimatai taarsiivigineqarsimappat imaluunniit taarsiivigineqarnissamik piunnaasaqarsimappat ajoqusernermut taarsiinissamut akisussaasinnaasumut taarsiinissamut piunnaasaqateqarsinnaanngilaq.

§ 18. Nalinginnaasumik taarsinissamut piunnaasaqaatit malillugit napparsimasumut taassumaluunniit qimataanut, § 10-mut ilaasumut taarsiinissamut akisussaalersimappat

piaaraluneerluni imaluunniit mianersuaalliorujussuarluni ajoquserneq pisimappat § 15 naapertorlugu taarsiinerit alla sinnerlugu akilersimasanut piumasaqaatinut taamaallaat tunngaviusinnaapput.

§ 19. Tunisassianut akisussaaneq pillugu malittarisassat malillugit taarsiinissamut akisussaasoqarpat §§-ini 17-imi aamma 18-imi malittarisassat atuutissanngillat.

Taarsiiviginninnissamut sillimmasersimanissamullu pisussaaffik

§ 20. Kapitali manna naapertorlugu tullinnguuttut taarsiinissamut pisussaaffeqarput:

- 1) Naalackersuisut.
- 2) Kommunit.
- 3) Katsorsaaviit namminersortut.

Imm. 2. Katsorsaaviit uteqqiasumik taarsiinissamut suliamik suliaqarfigineqarneri tunngavigalugit Nunatsinni Nakorsaaneqarfik Nunatsinni Nakorsaaneqarfiup ingerlatsinera pillugu maleruagassat naapertorlugit nakkutilliinissamut aallartitsisinnaavoq.

§ 21. Kapitali manna naapertorlugu taarsiivigineqarnissamut piumasaqaatit sillimmasiisarfimmi sillimmasertermut matussuserneqassapput, taamaattorli imm. 2 takuuk.

Imm. 2. Naalackersuisut, kommunit aamma oqartussaasut oqartussaasoqarfii allat namminneq sillimaserniarlutik aalajangersimappata imm. 1-imi sillimasertussaataitanermut ilaajunnaassapput.

Imm. 3. Imm. 1 malillugu sillimmasiinerit matussutaat nalunaarsorneri nakkutigineqarnerilu pillugit malittarisassanik Naalackersuisut aalajangersaasinnaapput.

Taarsiinissamut suliaassat suliarineqarnerat

§ 22. Taarsiinissamut suliaassat tamarmik kapitali manna naapertorlugu Nunatsinni Nakorsaaneqarfimmut tunniunneqartassapput.

Imm. 2. Nunatsinni Nakorsaaneqarfik katsorsaavimmit maalaarutigineqartumit imaluunniit peqqissaanermi suliaqartumit maalaarutigineqartumit journalini allattukkanik aamma oqaaseqaammik pissarsiniassaaq, aamma taarsiinissaq pillugu suliaq aalajangersimasup naliliiffigineranut pingaaruteqartutut isigineqarsinnaasunik Kalaallit Nunaanni pissutsinik atukkanillu allaaserinnittumik suliamik saqqummiussinissamut suliarinnissaaq. Suliamik saqqummiussineq atugassallu Patienterstatningen i Danmark-imut (Danmarkimi Napparsimasunut Taarsiisarfimmut) nassiunneqassapput taarsiinissamullu suliaq suliarineqarneranut tunngavissatut ilaatinneqassallutik.

Imm. 3. Nunatsinni Nakorsaaneqarfik suliaq piareersarneranut atatillugu pisoqalisoorsimaneq pillugu aalajangiisinnaavoq. Pisoqalisoorsimasinnaanermik apeqquut pillugu aalajangiineq maalaarutigineqarpat, suliaq tamanna Napparsimasunut Taarsiisarfimmut nassiunneqassaaq.

Imm. 4. Imm. 1 malillugu taarsiinissaq pillugu suliat Danmarkimi Napparsimasunut Taarsiisarfimmit aalajangiiffigineqassapput. Napparsimasunut Taarsiisarfiup aalajangiineq

Nunatsinni Nakorsaaneqarfimmut, taarsiivigineqarumasumut kiisalu katsorsaavimmut katsorsaanerup taarsiiviginnissuteqarniarfiginerisaanut nassiutissavaa.

Imm. 5. Aalajangiinerit tak. imm. 4, Ankenævnet for Patienterstatningen (Napparsimasut Taarsiiffigineqartarnerannut Ingerlatitseqqiisarfik) suliassanngortinneqarsinnaavoq, taassum aalajangiineq allaffissornikkut inaarutaasumik aalajangerneqassaaq. Ingerlatitseqqittarfiup aalajangiineq naqissusersinnaavaa, atorunnaarsissinnaavaa imaluunniit allannngortissinnaavaa.

Imm. 6. Napparsimasut Taarsiiffigineqartarnerannut Ingerlatitseqqiisarfimmu maalaaruteqarneq tunniunneqassaaq, maalaaruteqartup aalajangiineq pillugu nalunaarfigineqarnerata kingornatigut qaammatip ataatsip ingerlanerani. Maalaaruteqarneq kinguartitsisinnaanermut sunniuteqarpoq.

Imm. 7. Napparsimasut Taarsiiffigineqartarnerannut Ingerlatitseqqiisarfiup maalaaruteqarnissamut kingusinnerpaamik piffissarititaasup qaangerneqarnera naatsorsuutigunnaarsinnaavaa, tak. imm. 6, tamatumunnga immikkut issumik patsisissaqarpat.

Pisoqalisoorneq pillugu aalajangersakkat

§ 23. Taarsiinissaq pillugu piumasaqaat kapitali manna naapertorlugu, taarsiivigineqarsinnaatitaasup ilisimasaanit imaluunniit ilisimasariaqagaanit kingusinnerpaamik ukiut pingasut qaangiutsinnagit Nunatsinni Nakorsaaneqarfimmut nalunaarutigineqarsimassaaq, taamaattorli imm. 2 takuuk.

Imm. 2. Taarsiinissamulli piumasaqaat pisoqalisoorsinnaavoq ullup ajoqusernermut pissutaasumiit kingusinnerpaamik ukiut qulit qaangiunneranni.

Imm. 3. Maalaaruteqarnissamut piffissaliussanut taaneqartunut immikkut akuersissuteqartoqarsinnaanngilaq.

Pineqaatissinneqarsinnaanermut aalajangersakkat

§ 24. Unioqutitsineq § 21, imm. 1-imik pineqaatissinneqarnermik kinguneqartinneqarsinnaapput pillaammik akiliisinneqarnermik Kalaallit Nunaanni Pinerluttulerinermik Inatsimmi maleruagassat naapertorlugit.

Imm. 2. Inatsisartut inatsisaata malitsigisaanik najoqqutassat saqqummiunneqartunut tunngatillugu pineqaatissiisoqarsinnaavoq pillaammik akiliisinneqarnermik Kalaallit Nunaanni Pinerluttulerinermik Inatsimmi maleruagassat naapertorlugit.

Imm. 3. Inatsisartut inatsisaanni imaluunniit Inatsisartut inatsisaata malitsigisaanik najoqqutassanik saqqummiunneqartuni pillaammik akiliisitsisoqarnissaa aalajangerneqarpat, taava Inatsisitigut pisinnaatitaasoq pisussaataitaasorlu inatsimmi matumani aalajangersakkamik unioqutitsinermut akiliisussanngortinneqarsinnaavoq, Kalaallit Nunaanni Pinerluttulerinermik Inatsimmi maleruagassat naapertorlugit.

Imm. 4. Suliassat imm. 1-3 naapertorlugit suliarineqartussat Kalaallit Nunaanni Eqqartuussivimmut tunniunneqassapput, siullertut suliarinnittussatut.

Imm. 5. Pillaammik akiliisitsinerni imm. 1 – 3 naapertorlugit akilerneqartussat Nunatta Karsianut nakkartinneqartassapput.

Kapitali 4

Atuutilersitsinermut aalajangersakkat aamma Inatsisartut inatsisaanni allami atortuulersitsinissamut aalajangersakkat sunniutissanullu allannguinerit

§ 25. Inatsisartut Inatsisaat nalunaarutikkut atuutilersinneqassaaq.

Imm. 2. Maalaarutit aamma taarsiiffigineqarnissamik qinnuteqaatit katsorsartinnermut atatillugu ajoqusernermut tunngasut, atuutilersitsineq sioqqullugu suliarineqartut Inatsisartut inatsisaannut matumunnga ilaatinneqanngillat, Maalaarutit taakkua maleruaqqusat taamanikkut atuuttut naapertorlugit suliarineqassapput.

§ 26. Inatsisartut Inatsisaata matuma atuutilerneranut peqatigitillugu Peqqinnissaqarfiup aqunneqarnera, aaqquissuusaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27, 18. november 2010-meersumi aammalu Inatsisartut inatsisaatigut nr. 2, 29. maj 2012-imeersutigut allanngortinneqartumi makku allanngortinneqassapput:

- 1) § 9, imm. 4, § 10, imm. 2, § 11 a aamma § 11 b atorunnaarput.
- 2) § 12, imm. 1-imi - 3-mi "§§ 3, 4 aamma 11 a" imatut allanngortinneqassaaq: "§§ 3 aamma 4":

Imm. 2. Napparsimasut Maalaarutaannik Aalajangiisartunut maalaaruteqartarnek pillugu Namminersorlutik Oqartussat nalunaarutaanni nr. 14, 24. september 2012-imeersaq atorunnaarpoq.

Imm. 3. Nunatsinni Nakorsaaneqarfiup sulinera pillugu Namminersorlutik Oqartussat nalunaarutaat nr. 7, 15. juni 2017-imeersaq Inatsisartut Inatsisaat manna naapertorlugu najoqqutassianik atorunnaarsitsinissaq imaluunniit taarsiinissaq tikillugu atuutiinnassaaq.

Namminersorlutik Oqartussat, ulloq xx.xx 2021

Naalackersuisut Siulittaasuat